

# mainatges d'òc

# PLUMALHON

(5,70 €)

ISSN 1264-6733

Los mainatges monges

Los Minons





Que i a hòrt d'animaus qui sorteishen sonque de nueits. E donc qu'ei lo matin qui trobam tralhas deu lor passatge.

Qu'ei a l'entorn d'un clòt d'aiga o suu bòrd d'un arriu, au ras d'un bòsc, que trobaràs sovent peadas e ditadas d'animaus, mamifèrs o ausèths.



# Tralhas, peadas e indicis

Los animaus que dèishan emprentas en lo sòu sustot quan la tèrra ei motha e hangosa après la ploja. Taus mamifèrs que calerà aprèner a diferenciar los qui an pedits (cabiròus, sanglars...) e los qui, com gats e cans, e van sus coishinets.

Que i a tanben las tralhas que dèishan los animaus qui's fretan aus arbres o qui's brusan hens la hanga. Los sanglars que's brusan atau e après que's van gratar a la pèth deus arbres.

Peada de sanglar



Peada de can



Ditada de bernat-pescaire



Peada d'arrat-castòr



Los cabiròus que hregan los arrams aus troncs o que pelan los arbres joens tà minjar la pèth.

Ausèths com lo pic-escorcèr que dèishan tralhas sus la pèth deus arbres en cercar vèrmis e insèctes.







Cagadas de lapin

Que trobaràs tanben las cagadas de quauques animals qui son pròvas deu lor passatge.

De que n'i a que deisharàn çò que non pòden pas minjar de la lor preda.



Cagadas d'arrat-castòr



Los peus deus animals tanben que's pòden gahar aus hissons deu hiu d'archaut :

peus de lapin o peus de vop.

En las bòrdas o los solèrs que trobaràs pelòtas qui son las dejeccions deus rapaces e deus ausèths nueitius com las cavècas o los gahús. Qu'ei çò qui non pòden pas digerir de las lors predas.



Pèth de cernalha



Anem a tu de har l'enquèsta adara !

Quish las cernalhas e las sèrps que pèthmudan. Que trobaràs còps que i a las pèths ancianas.

Los cèrvis que pèrden los arrams a la prima e los cabiròus a l'abòr. Que pòt aparir que tròbis arrams en caminar per un bòsc.



# Quin motlar las peadas ?



Plumalhon que t'ensenha quin cau har tà motlar las emprentas e autas peadas e ditadas d'animals.

Que't cau :

- ua botelha d'aiga
- listras de papèr cartonat
- un rotlèu de scotch
- un sacòt de plastre

especiau (que seca rapidament)

- un pincèu
- ua culhera
- ua grasala o aute recipient tà destrempar lo plastre.

## Etapa 1



- Quan as trobat ua peada, pren ua listra de papèr e hè un cerc.
- Aqueth cerc de papèr que deu entornejar l'emprenta.
- Que pòdes prémer drin tà har entrar lo carton hens la hanga.

## Etapa 2



- Tà destrempar lo plastre que cau, per exemple, hicar dus veires d'aiga per dus veires de plastre.
- Mescla plan.
- Lo plastre non deu pas estar tròp liquide ni tròp dur. Que'u cau har colar hens lo cerc e avisar-se que sia plan espartit.
- Dèisha secar vint minutas.

## Etapa 3



- Tira lo cerc de papèr. Se lo plastre n'ei pas pro sec, dèisha secar cinc minutas mei.

## Etapa 4

- Quan vòs har un molatge atau que vau mei que lo sòu e sia umide.
- Tira la placa de plastre e dab lo pincèu trempat hens l'aiga, neteja dab suenh la tèrra qui serà demorada pegada.



Fred Lavail